



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

40. Kalenderwoche – ab 3. Oktober 2010

Haarisches

Nee, was abor ooch immor so in dor Zeidung schdehn dud... - ham Sie das villeischd ooch gelähsn? Dass 65 Brozennd dor Leide solsche Männor scheen findn dädn, die gladd sin wie e Aal. Ohne Haare off dor Brusd! Das is doch... hä? Das kannsde doch nisch gloom! Mann ohne Haare is doch wie Fisch ohne Grädn! Odor wie Bier ohne Schaum! Isch meschde wissn, wähn die da gefrachd ham! Misch jednfalls nisch! Un meine Gudste ooch nisch! Die schdehd off männlich Behaarung. Is doch schon schlimm genuch, dass de Fraun sisch ieborall rasiern missn, weils ehm Mode is. In Ameriga soll ja eene Frau, die Haare an de Beene ham dud, e Schgandahl sein.

Abor dor Haarwuchs is doch irschendwie was ganz Nadiehrliches! Guhd, wenn sisch dor Mann das Gesischd rasiern dud, dann is das villeischd ooch eene Frache dor Begwähmlischgeid - e Vollbard is sähr anschdrendend beim Essn un ooch beim Drinkn.

Wobei - warscheinlich dud ja die Mode, dass sisch Männor im Gesischd rasiern dun, daderhähr schdamm, dass mor unnor eenor Gasmasge keen Vollbard ham darf, wemmor ieborlähm will. Ja, ooch, dass de Männor offm Gobb de Haare ganz gurz ham, das dud ausm Griesch hährschedamm. Weil ehm, wensde Schdahlhelm drachn mussd, keen Bfärdeschwanz machn kannsd!

Mor kennde villeischd sachn, dass bei de Männor de Haarendfernungsmode eene Folsche dor modernen Grieschsfiehrung is. Wenn de jung Männor zur Fahne mussdn... seid baar hunnord Jahre... da war de erschde milidärische Amdshandlung - Haare abschneiden! Am Gobb! Abor nisch off dor Brusd! Warum nu jездde dor Mann ooch off dor Brusd haarfrei sein soll...?

Isch will ma sachn, wenn Haarfreiheit offm Gobb Mode sein däde, da kennde isch ohne Broblehme midhaldn - mei Scheidl dähr dud middlorweile ja ooch schon mähr einem Gahlschlach gleischn!
Abor Haarfreiheit off dor Brusd... - nee! De gesamde Mannwerdung is doch irschendwie in de jung Jahre offs engsde mid die Haare verbundn gewähsn. Wie hasde disch als jungor Gerl gefreid, wenn de de erschn Haare enddeggd hasd, am Ginn, off dor Brusd odor an annorn wischdischn Schdelln, die fiehr de Männlichkeid von Bedeutung sin. Behaarung un Mannwerdung is doch eens! Un es hieß ja ooch immor - kee Haar off dor Brusd, abor Labaloma bfeifn!

Abor isch weeß schon, wähn die gefrachd ham! Isch ahne, wo dähr Wind hährwehn dud - gladde Männor! Das dud beschdimmd von die komm, die keene Frau zur Frau nemm dun, sondorn, die een Mann zur Frau nemm! Genau von die! Die wolln ehm wahrscheinlich, wennse schon keene Frau ham, wenischdens een Mann ham, dähr so gladd wie eene Frau is! Es däde misch nu ooch gahr nisch wunnorn, wenn die solsche Männor scheen findn dädn, die een kleen Busn hamm. Isch meene, ooch bei mir is da ja schon e kleenor Ansatz vorhandn. Abor dass Fraun gladde Männor scheen findn dun, das kannsch mir eenfach nisch vorschdeln. Un meine Gudste ooch nisch!

Eduard Sachsenmeyer